



Minggu, 07 Maret 2021

Ogen: 1 Kronika 28:9



Tutus Erdahin



Enterem kalak kisas erdahin. Si e erkiteken erdahin e latih. Banci latih rukur entah latih daging kula. Emaka melala jelma la tutus erdahin perban la lebih idahna selain "latih" erti erdahin enda. Amin la sitik si she tutusna sabab meriah ukurna ibas erdahin apaika ulih siialokenna erbahanca she sura-surana.

Sope manusia ndabuh ku bas dosa maka enggo iperentahkan Tuhan guna pekena-kena doni enda. Paksa si e erdahin langa bo latih erkiteken manusia lenga kedosan. Tapi kenca manusia ndabuh ku bas dosa maka erdahin e arus curcur panas. Si e erkiteken doni enda enggo kena sumpah Dibata. Curcur panas benana erkiteken ulih manusia erdosa. Tapi kedungenna i bas mata kiniteken curcur panas e bagin pasu-pasu man banta. Alu nggit kita curcur panas maka kulanta pe sehat janah banci kita erguna ku kalak si deban arah ulih pendahinta.

Salah sada pedah Daud man anakNa Salomo i bas ogenta eme *"O anakku, kukataken man bandu, tandailah Dibata bapandu dengen erdahinlah guna Ia alu bulat ukurndu janah tutus atendu."* Perintah pemena si pentingna eme nandai Dibata. Nandai Dibata eme lit hubungenta si khusus ras Tuhan. Alu hubungan enda me maka banci si dahiken dahinta alu bulat ukur dengen tutus. Sabab itandaina Dibata si isembahna e Dibata si erdahin dengen nuruh manusia gelah erdahin. Man kalak si bage maka kai pe si idahikenna eme guna kemuliaan Dibata. Erdandanken si e maka kune kalak erdahin enggo seh ku "level" sibage rupana maka lanai ia ngidah erdahin e terjeng latihna. Tapi erdahin e sada keriahen ukur erkiteken banci ikut mpermuliaken Tuhan i bas doni enda. Ulih pendahin e la terjeng kai sialoken kita, erguna man banta rikut ras keperluan geluh tapi pe pengataken bujurta man Dibata.